

INUIT ATAQATIGIIT INATSISARTUNI



23. juli 2021

UKA2021/090

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Tunup sineriaani qilalukkanik qernertanik kisitsinissap piniartunik piffinni ilisimasaqarluartunik peqataatitsisup 2022-imi aallartinnissaa pillugu Naalackersuisut peqquneqarnissaannik Inatsisartut aalajangiiffigisassatut siunnersuut.

(Inatsisartunut Ilaasortat Harald Bianco & Knud Mathiasen, Inuit Ataqatigiit)

Tungavilersuut:

Tunup sineriaani qilalukkanik qernertanik kisitsinissamik siunnersuutigisatta nunataa kingullermik kisitsivissamit annertuneroqaaq. Tamatumunnga piniartut piffimmi ilisimaarinnittut oqaluuttarnerini sineriak isorartunerusoq misissorluarneqartariaqartutut pisariaqartinneqarnera tungaviuvoq.

Kisitsineq minnerpaamik Ittoqqortoormiiniit kujatinnguaniit kujammut Timmiarmiut tikillugit ingerlanneqartariaqartoq isumaqarpunga piniartut ilisimasaat aallaavigissagaanni. Aasap ingerlanerani suliaq naammassisinnaangippat, suliap aasap tullianut nangissinnaanera sillimaffigisariaqarpoq.

Kisitsinermi Naalackersuisut piniartunik piffinni ilisimasaqarluartunik peqataatitsinissamik qulakkiigaqassasut kaammattorusuppagut. Piniartut ilisimaarineruaat qaqugukkut kisitsisoqarpat pitsaanerpaajussasoq. Taamaattumik kisitsinissami biologit piniartullu suleqatigeeqqissaartariaqarput.

Pisortanut aningaasatigut allaffissornikkullu kingunerisassai:

Kingullermik kisitsisoqarnerani aningaasaliissutit marloriaatinngortinneqarnissaat siunnersuutigineqarpoq.

INUIT ATAQATIGIIT INATSIARTUNI



2016-imi Tunumi qilalukkanik kisitsisoqarmat 1,1 mio. kr. timmisartunut aammalu 0,6 mio. kr. paasisat suliarinerinut aningaasartuutitut atuisoqarpoq. Tunup sineriaani qilalukkanik qernertanik kisitsinissamik siunnersuutigisatta nunataa kingullermik kisitsivissamit annertuneroqaaq. Tamatumunnga piniartut piffimmi ilisimaarinnittut oqaluuttarnerini sineriak isorartunerusoq misissorluarneqartariaqartutut pisariaqartinneqarnera tunngaviuvoq. Taamaattumik kingullermik aningaasaliissutit marloriaatingortinnissaat pissusissamisuusaaq. (3,4 mio. kr.), misissuiffissap isorartunerunera eqqarsaatigalugu timmisartunut atuinerup annerunissaa ilimagineqarmat.

Namminersortunut aningaasatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.